

中国名山志



中国文献珍本丛书

中国名山志 (五)


全国图书馆文献缩微复制中心



中国名山志目录（五）

衡岳志
九华山志

三九一



衡岳志卷之六

分巡上湖南道僉事東莞鄧雲霄編刪

衡州府知府長泰楊鍾英

衡陽縣知縣清江羅夢暘

衡山縣知縣汜水何登高同訂

鄉紳禮部郎中耒陽曾鳳儀輯纂

衡州府學生負王邊寧

衡陽縣學生負王國泰

劉經筵

臨武縣學生負鄭祖詩

柳州 學生貢袁伯璣同校

祀記

祀南岳記

楊又玄

洪武三年春正月四日群臣來朝

皇帝詔曰朕自起義兵臨濠率衆渡江宅于金陵每獲城池必祭境內山川于今十有五年罔敢或怠邇者命將出師中原底平岳鎮海瀆悉在封域朕託天地祖宗之靈武功之成雖藉人力然山川之神實默相予况自古帝王之有天下莫不禮秩尊崇朕曷敢

遠於是親選敦朴廉潔之臣賜以衣冠俾齋沐端悚
以俟遂以四月十五日授祝幣而來焉臣又玄承詔
唯謹以五月十七祭祠下威靈歆格祀事孔明礮石
鐫文用垂永久惟神長養萬類奠于炎方典禮旣崇
綱維斯在尚祈陰陽以和風雨以時物不疵癘民庶
乂安是我
聖天子之所望於神明者而亦神明祚我邦家之靈
驗也

祀南岳記

曾鶴齡

皇帝嗣位改元之初二月十一日冕服御

奉天門臨百官親遣大臣若左右侍從分行天下祭
告_中鎮海瀆及諸應祀之神香幣儀物悉出內帑祝
告辭文啓自

聖衷盛哉帝舜氏望于山川徧于群神之意也於是
臣鶴齡預有祀衡山之命衡山在南服之地去京師
幾萬里晝夜行五十日始至至則四月一日矣時陰
雨晝晦泥淖溢路懼不可將事然不可緩卜以四日
丁卯省牲是日雨止風作晚遂大霽戊辰昧爽致祭
天宇澄明月星顯露靈風徐來祥煙氤氳牲肥酒冽
黍稷馨香樂音清越獻奠望瘞進退陟降咸不愆度

禮畢享胙廟下衆大喜以爲天道順應神靈格饗實
國家萬萬無疆之慶兆民康阜無有厭斁之徵也臣
鶴齡益懽抃不自勝遂復至廟上徘徊顧覽嘆其室
宇頽圯勢當復新而獨前代碑刻僅存然漫不可讀
者十五六已而升望四麓求所謂七十二峰者舉目
得其大半然其竒勢詭狀亦不能盡記退思南方諸
山之宗惟是衡岳其祀禮備厚蓋自唐虞三代已然
後代迭加徽號雖皆崇之之意而實不經我

太祖皇帝例正定之以破千萬年之惑而於享祀禮
數特增嚴謹故其初也江夏侯周某實爲獻官其後

御旨
卷之二
三
累累率遣道士蓋謂方外之可交於鬼神去年

仁宗皇帝卽位特遣詹事丞鄭某實來今年臣鶴齡

又以翰苑之職至此蓋皆重其事也亦猶

太祖皇帝始遣江夏侯之意顧臣鶴齡才藹德涼無

足堪命然以文字爲職業宜有所紀以丕揚

聖天子禮神之休命而于農事方興不可攻石以刻

遂記其月日事始終臣鶴齡所以來之故手寫通

以授衡山令李幹丞楊珪俾倘得石刻焉幹與珪皆

預祀事而克恭命者也且爲政皆宜其民故并記於

末云宣德元年丙午歲夏四月也

祀南岳記

周叙

五岳天下名山之最尊者也江南之山得名者尤衆而莫尊於南岳衡山唐虞三代已然宋南渡後去中州光遠獨宗祀南岳故其廟貌穹壯偉麗非他祠比神靈變化輝赫顯應殊多我

太祖高皇帝尤重神祀每三歲頒香幣著爲令典人君嗣位及有事祈禱必遣大臣及近臣代行皆重其禮也今歲自春逮夏亢旱連月農民失望

皇帝怛然以爲憂旣恭致告

郊社百神復親製祝文具香幣分遣近臣禱祈岳鎮

海瀆之神憫農之念敬祀之誠至矣盡矣叙寔承
命祀南岳驛走四十日至祠下卜六月己丑從事前
三日薰沐齋戒屆期牲醴肥潔黍稷苾芬對越精神
禮度維謹禮成雲陰四起翌日甘雨遂降衆皆懽忭
鼓躍以爲

皇上一念孚感所致也猗歟盛哉預期有司鑿石刻
御製祝文復相率謂予宜有文以識來祀之意予不
敢辭惟古先王之祀有告焉有祈焉有報焉雖施舉
有殊而於民尤切神依民以安民賴神以寧况皇帝
神聖爲山川百神之主憂憫元元祈告精懇若斯則

禮司方岳靈效彰明者得不同體

上心霽施膏澤以福庇斯民耶吾見報祀之典自天
降錫有日矣時廟貌頽圯

朝廷方敕有司修葺衡州府同知胡忠寔董其役而
衡山知縣龔俛縣丞方紳典史林福儒學教諭萬幹
訓導邊韶美暨長沙府照磨高文皆預祀事遂并記
之其執事諸生及凡預事者悉列諸碑陰云正統九
年歲次甲子夏六月記

祀南岳記

章玄應

弘治六年二月

聖天子以畿甸山東山西河南等處亢旱爲災用廷
臣議遣使齎香幣

命所在巡撫大臣及藩省長僚祭告岳鎮海瀆祈禱
雨澤敬恭明神憫念元元之意蓋無以加矣惟特巡
撫湖廣都憲謝公以工部侍郎赴

召都憲韓公繼之而尚未至方伯劉公以道病卒於
是巡按待御田公恐稽

上命以玄應分守湖南而南岳衡山在境內移交代
行玄應適按部長沙閏五月辛亥聞

命兢惕懼弗克荷壬子子冒炎暑兼程疾馳乙卯至祠

下丙辰謁廟當午風起雲合雷電交作大雨斯注
暮少霽乃省牲已而又雨入夜弗止丁巳將事之頃
雲霧斂晦天宇澄徹佳氣氤氳祥飈薦爽牲肥酒香
品物豐潔鼓鐘笙磬之音薦裸興俯之節一如舊章
罔有愆越祀禮告成雨聲達曙循故事享胙衆皆感
戴欣悅請以

御製祝文勒諸堅珉并紀其事以昭示無極嗚呼
宵旰一念之誠格于上下雖南北相去萬里而感應
神速如此書曰至誠感神蓋明則有禮樂幽則有鬼
神天人相與之際不可誣也然則甘霖大沛寰宇沾

足豐年穰穰之慶自今以始人有仰賴神有依歸實
國家億萬年無疆之休也猗歟盛哉顧惟卑陋叨預
祀事曷足以丕揚
顯命謹脩述始末如此俾刻之而允陪祀執事者并
列於後云

詣南岳禱雨記

汪 玩

嘉靖己丑冬余奉

命通判衡州府事由湘東買舟而來道衡山遙瞻南
岳之峰攢秀聯青雲氣吞吐頃刻萬狀識者可不待
扣知爲巨靈所宅時倥惚弗克進謁歲庚寅六月以

公幹至衡山南岳之勝復宛然在目時方憂旱安禱
彭君簪知縣事余語之曰夫雨乃陰氣上升陽氣下
接和爲雨降而名山大澤實陰氣所萃南岳名山也
予往禱之卽日齋戒存誠翌辰啓行時溽暑途熱如
蒸從望岳門而出忽陰雲四合火日蔽蒙郊外良田
黽黽禾穎青黃相錯而或間以紅蓮綠蓋望之如鋪
錦焉行五里喬松夾道連陰如橋叢秀如蓋清風微
動涼颼四薄頓覺襟期開豁殊有清况時見田夫野
婦競引桔槔以漑久曝于日面若枯黎爲憮然久之
行三十里始抵行館而日晡矣邑庠諸生胡其然請

省牲夜二鼓視事於堂堂距館一里許事竣回館少
憇忽聞窗外有雨聲亟視之密雨如織心喜甚賦五
言近體二首五鼓雨弗止束燎以行人殿門雨忽收
霽乃鞠躬屏氣趨殮俎豆洋洋然若有昭臨於鬱鬱
之間者焉禮成歸館而雨復至庠胡生進曰先生格
神捷應若斯予曰神之惠也予何德而至此耶黎明
欲躬叩其巔以畢予誠以終徹神惠從者有難色予
決策往焉由廟右循塢以登依麓有屋數楹爲胡文
定公書院時茂草茸塞山徑甚狹上數里有飛泉噴
薄於懸崖間下窪爲潭潭名絡絲相傳夙有靈物宅